

四庫全書

集部

欽定四庫全書

集部

吳郡文粹續集補遺卷上

詳校官庶吉士_臣朱理

侍讀_臣孫球覆勘

總校官進士_臣繆琪

校對官監丞_臣張曾炳

謄錄監生_臣錢雋選

欽定四庫全書

吳郡文粹續集補遺卷上

明 錢穀 撰

雜文

吳越故東海徐太夫人墓誌

李潯

夫月滿則虧日平則昃盛衰之道古今而同也其有秀而不實者得無痛乎夫人徐氏其先東海人也粵以玄元降聖盤條仙樹之端洎唐后啟圖析派天潢之側龍飛鳳翥殷鼎闕壇閼闢動賢無出其右官諱軻任省營

田隊夫人姪渤海

闕

吳皓僕射

闕

宣賜褐裳之管轄營

田隊務文華擅美器宇弘深夙嫻

闕

悌之規抗見燾之

色百行之美實無闕焉悲娶

闕

一卒九乎三紀何期

陳駟難追游波莫遏享年五十有六偶暫攝調

闕

于顯德三年歲在丙辰九月庚寅朔五日甲

闕

寢疾

殞于吳縣令德鄉之私第也

闕

夫人有子六人長曰

承嗣効

闕

衙內直番隊充副將次曰承寵係營田甲將

次承鄴營田副將次五兒滿兒淡幼稚未効職員有女

三人長曰十八娘聘于金氏次曰十九娘在室未從伉
儷次廿娘捨棄俗華以投金地于福田寺慕真堅守緇
門精專戒行子聶一人金氏弘綰新婦二人長曰沈氏
次曰曹氏嗚呼封樹告期龜筮叶吉以十月庚申十四
日癸酉窆于吳縣胥臺鄉尚書里闔閭城西去祔五十
餘里先祖塋之側禮也杼恐天地長久陵谷變遷令嗣
號訴願勒貞石以誌于墓潯春獲知音得不涕泗揮毫
叙錄其實而為之銘曰

委質荒阡凝神上仙遶遶三界茫茫九泉遠岫烟暝高
空月懸聲沈永矣松檟蕭然

右誌乃香山潘氏鋤頭而得章簡甫榻得見惠恐歲
久湮沒重錄于此顯德乃五代周世宗三年也據誌
徐夫人生唐僖宗中和元年

宋朝散大夫提舉舒州靈仙觀章公墓

楊時

公諱甫字端叔姓章氏公八世祖乃為康州刺史自南

康徙居建州之浦城其孫仔鈞仕王氏官至太傅仔鈞
為泉州團練副使兄弟皆有功于閩故號仔鈞為小太
傅仔鈞之後居西村仔鈞之後居珠林自是分為二族宋
興幾二百年西村世有顯人珠林久不振至景德中公
之大王父始以進士中甲科而仕至秘書丞公于熙寧
三年繼登科而後珠林之族浸顯矣公資穎悟方幼學
已能屬文年十四即辭親求師友薄遊江淮間殆十年
能自力卒以名聞于時初調撫州臨川尉盜有刦行商殺

人者吏以枝詞蔓其獄連逮者以十數累日情不得公呼
囚令環坐以事驗之俄引三人出曰汝實為盜餘悉縱
之使去三人者卒服其辜無異辭其遇事巧發竒中類
如此人莫能測也就移壽州壽春令大臣有以公孟子
解義進者詔付秘書省除應天府國子監教授用舉者
改著作左郎官制行換宣德郎知越州山陰縣事山陰
號繁劇訟牒日紛至公處之裕如也巨猾陸瑋輩竄易
戶名以避征役公閱籍具得其情狀坐流配者數人老

姦宿吏屏跡聽命無敢復自肆者邑大治境內有海塘
渚水溉民田歲久湮塞不治為旱患公鳩徒濬之仍為
經畫為久計民至今賴焉秩滿轉奉議郎監左藏北庫
哲宗即位轉丞議郎通判宿州先是南京押綱侍禁吏
士宗侵耗官米數百石反訟倉官出納不公獄久不決
朝廷以委公至即片言折之士宗雖坐流竄去而自以
為不冤又兩遷為朝散郎繼丁親憂去職久之除大府
寺丞轉朝請郎召對稱旨除府界提舉常平等鄆陵舊

有雙泊河數溢為民害二縣以開濬為請公為親行堤上得舊河經始之意本欲殺惠民河水流而歸之蔡河稍加開濬則惠民之注流益悍而蔡河不足以吞納則為害滋甚不若增濬河外故道雙泊雖溢可恃以無患是歲河朔飢民流入畿甸者不可以數計公召而廩給之因以用其力故事成民不告病而飢者得以全活公私之利蓋兩得之也上皇即位轉朝奉大夫未幾除知虔州州為江西劇郡俗健訟公下車痛治妄訴者一

人迄公去無或干政犯令者是時承平日久屢豐年天下諱言災傷無以民病告者公還朝首言淮甸歲凶宜加賑恤大臣初雖不許感公誠意懇惻故卒從之翌日遣使大發倉廩而民賴以濟公之力也宗寧初黨論復興義士膠口無敢竊議者公除郎官得旨陞對抗言元祐臣僚削秩投荒皆緣國事陛下即位制令內徙道路交慶今復刻名著籍禁錮其子孫恐非陛下本意臣竊惑焉上雖優容之然亦由是與時論不合矣會宰相曾

公布得罪言者因以微文詆公從坐降一官罷尋知泰州遂挂冠退居吳門未幾上記其姓名特旨落致仕復知泰州之官數月即乞宮祠得提舉舒州靈仙觀崇寧五年六月八日以疾終于平江府之私第享年六十二歲以其年十二月十六日葬于吳縣長山鄉仕墟道士隲之原公莊重簡默而接人以和氣行已涖官一本于誠不表襮以自售其論天下事不苟不隨期于當理而已方元符末議役法請循元豐時為便或疑其朋附及

崇寧陞對抗言黨錮非是聞者駭汗乃知公之用心合
天下至公無彼時此時之間公以是數忤權貴竟以不
遇公仕于朝兄弟請別居公盡以已所當得田業均之
且立券與之約毋得輟典賣而其後兄弟之子有破其
產者卒賴此以為生公之惇族為之長慮如此公平生
無聲伎珍奇之好獨讀書萬卷讐校精至手澤具在有
文集二十卷孟子解義十四卷曾祖可法故任秘書丞
祖偃之不仕父說故任通直郎贈朝奉大夫娶沈氏起

居舍人諱季長之女也封宜人公襟度簡遠未嘗問生
事然奮羈旅起家闔門千指有宅以居有田以食夫人
之力也其經理家事無巨細皆有節法豐而不侈儉而
不陋調睦內外雍如也自政和以來四方無虞仕進者
以攀附為榮而夫人獨戒其子以宜安素分遠權門盜
賊且起無遠官以貽吾憂諸子謹奉其教卒無患聞者
服其遠識建炎二年八月二十五日以疾終于正寢享
年七十有四以是年十月二十二日祔葬于公之兆子

男八人長愿宣教郎知杭州臨安縣事次師中早世次
懋迪功郎池州士曹掾次愈從政郎和政士曹掾次憲
次懋次懋皆業儒未仕女四人長適宣教郎知舒州宿
松縣事孫實次適朝散郎直秘閣廣東路提舉常平等
事王舜舉次適奉議郎秀州司錄事邵勲次適奉議郎
主管亳州明道宮呂弼中孫男女二十二人建炎之初
其子憲不遠數舍詣毘陵踵吾門而告曰先君之亡二
十有餘年矣而無幽堂之銘其盛德懿行恐遂泯沒無

傳焉敢以是請久之余未暇作也又遭母夫人之喪復以書抵余而請之益至余雖不及見公而公之子憲慈從余遊義不得辭也乃為之銘使歸而揭之墓上銘曰奮用羈旅砥節不移遵義而行不苟不隨黨籍之興公獨有言為人不能展也直言銘以昭之庶永其傳

故翰林檢討陳君墓碑銘

楊士奇

仁宗皇帝初臨御獎用儒術茂興文治首命在廷舉賢薦能于是少保臣士奇言蘇陳繼其文學宜在侍近即

日詔驛召之即至授國子博士明旦入謝改翰林五經
博士時初建弘文閣于思善門之右以儲經籍備訪問
而命翰林學士楊溥董之擢侍講王進及繼等三人副
之今上嗣大統詔修兩朝實錄焉無幾賜勅命實錄成
賜白金及織金文綺衣遂進檢討宣德七年五月自陳
老疾奉命致仕歸又明年疾加遂不起五月某日也子
是其子完走北京求文書墓碑嗚呼斯文老成凋喪殆
盡士奇忍以衰病而忘情老友哉按其學者大理評事

張益狀陳氏其先家蜀與宋文忠公堯叟同祖堯叟從父諱鄴始徙南康之都昌七世至諱篆登宣和六年進士乙科累官左朝散大夫明州通判再徙星子又五世至諱洽咸淳貢士貢士生元翰林待制諱全待制生諱徵受學臨川吳文正公為通儒至正間廷臣交章起之將授之官以介持不偶自引去又徙蘇州之吳縣娶宋相江文忠公萬里之孫生諱汝言博學有才具洪武初仕為濟南府經歷所設施秩然條理一郡倚重大將軍

出師道其境深見獎重娶吳氏初生三女經歷公方以
嗣子為念在濟南一夕夢白衣大士已而生男即檢討
也初名釋童更名繼字嗣初晚號怡菴嗣初生十月經
歷公沒母抱之歸蘇家具蕭然惟存書二萬卷及蔬地
二十畝其母知學問謹禮法守節不嫁以教育遺孤嗣
初稍長克自奮勵其天資明果曲奉母訓外從良師日
益見端緒又進而從明經師遂深于易詩又求邃于古
文者而師之其為學自經史百氏皆博考深究久而淹

貫沛然為文章根義理辨體製嚴矩矱力去陳言不肯苟率由是聲譽蔚然見重于三吳求文者接踵戶外而從學日輻輳講下其施教有本末主敬為要明理為務後在館閣于商確古今講論述作之旨娓娓皆有所自衆推勝之居家篤孝行雖貧而講授之暇躬治蔬圃以資養甘旨恒充有司上其母貞節詔旌表之自是遠近交聘嗣初學官一以親老辭親沒祭葬盡禮與人交以誠善者獎掖之不善者面警飭之不肯媵媼苟容窮乏

者賑給之沒無歸者歛葬之雖官于朝其志泊如蓋未
嘗一日忘幽閒之適既得請歸吳中之學者忻忻皆喜
得所依而從遊者益衆既疾革門人請所欲言舉西銘
存順沒寧答之遂卒春秋六十有五其卒也族姍門生
故舊皆臨哭郡自守貳以下咸走弔祭遠近大夫士皆
嗟歎悼惜其所著詩文有怡菴集四十卷藏于家其配
故蘇守金綱之子儉謹克孝先十二年卒子男五宗寬
宏宣完皆志于學女二長適謝璜次在室孫男七傳儀

仁偉佃估補女四其葬在縣之太平鄉薦福山之原銘
曰

有碩其光自陳宗室派衍于蜀英傑森出沿江而東來
徙南康再徙閩閩代有奮揚卓乎怡菴克奮于孤幼志
桓桓壯夫莫踰有書充棟有畦繞宅晝鋤夕誦孝養是
力浩乎其學遠乎其文求道請業從遊詵詵辟書駢來
親養弗舍晚而幡然玉堂金馬抽思發才效勤紀述長
簡巨策金匱石室冲澹之志食息靡忘引疾謝榮適復

予鄉邦有耆俊如璞在石山林草木光輝潤澤奄其永
逝士林興悲紛彼俗學俚俚奚歸刻詞墓前式示來者
尚有懷德車過斯下

御醫趙彥如墓志銘

楊士奇

太醫院御醫趙友同字彥如大臣嘗言其文學于上時
方修永樂大典即用為副總裁後修五經四書及性理
大全書又用為纂修書成皆被寵賜于是知彥如者皆
為之喜且意其將有詞林翰苑之遷也而彥如亦異得

一職于此為其親榮未幾以母喪去又未幾以病不起
嗚呼惜哉彥如沈實溫雅有行義自其少篤志學問手
一卷祁寒盛暑不釋嘗授經前翰林承旨金華宋先生
為文章貫穿經史優柔縝栗或豐或約必歸宿于理今
祭酒胡公教諭華亭時首舉為訓導既而浙江布政司
聘考鄉試華亭滿九載天官考最當陞太子少師姚公
言其邃醫詔陞太醫院御醫會浙西水有言彥如知水
事者又奉詔從今戶部尚書夏公往治之士恒患有所

負挾無所遇而不見試也若彥如所長數數見用于世
彰明如此其可謂榮遇而無憾也矣彥如系出宋南陽
侯仲鑛仲鑛生士翽為武節大夫處州兵馬鈐轄因家
處州士翽生武義郎不玷官浦江子孫又徙家焉曾祖
崇侯祖必俊父良仁又徙蘇之長洲故彥如今為長洲
人母鄭氏彥如卒于永樂十六年四月一日春秋五十
有五所著有存齋集若干卷藏于家娶邵氏子男三季
珣季諒季成女二華信張瑜其壻也孫男一人興文其

子卜以卒之歲十二月某日葬某鄉某原先事以治命
齎監御史張循理所具事狀來求銘蓋余知彥如者銘
曰

士之所貴實有諸內有蘊而奇貴弗時遺崑岡之產用
則為寶為璫為主彼此奚較嗚呼彥如既試有聞肆予
作銘慰其九原

偶得墓志銘數篇補錄於右

彭循字子陽建國三年海賊丁儀等萬人據吳

太守狄君聞循勇謀以守命循與儀相見陳說

利害應時俱散民歌之曰循傳作彭修毘陵人

時歲倉卒賊縱橫大戟長弩不可當賴得賢令彭子陽

循時為吳令
右事出吳錄

第五倫薦謝夷吾文

班固代作

竊見鉅鹿太守會稽謝夷吾出身東州英姿挺特少膺
儒雅綜校圖錄昔為陪隸與臣從事奮忠毅之操躬史
魚之節及應選作宰惠敷百里爰牧荊州威行邦國遷

守鉅鹿政合時雍宜當拔擢使登鼎司臣以頑鴛尸祿
負乘願乞骸骨更授夷吾以厭率土之望

張霸作郡民語

永元中

城上烏鳴哺父母府中諸吏皆孝子

又越賊歸附童謠曰

棄我戟捐我矛盜賊盡吏皆休

功曹唐景對太守麋豹問風俗所尚

永興中

處家無不孝之子立朝無不忠之臣文為儒宗武為將

帥

東門與歷吳濟陰二郡太守所在貪濁謠曰

東門與取吳半吳不足濟陰續

許貢表孫策于漢帝云

策驍勇與項籍相似宜加賚寵召還京邑若寘于外必
為世患

蔡洪答刺史周浚論吳士吳展書吳時人

士季忠足矯非清足厲俗信可結神才堪幹世誠聖世

之老臣明時之俊乂也

顧榮與親故書

時傳咸為吳國內史故也

傅長虞勁直忠果雖非周才亦足貴也

吳人歌鄧攸云

統如打五鼓雞鳴天欲曙鄧侯挽不來謝令推不去

王治為吳國內史在郡上表云

編戶僵屍葬糞無主或闔閭餓餒煙火不舉

劉損為吳郡至閭門入泰伯廟室宇隕毀牆垣

不修損愴然曰

清塵尚可髣髴衡宇一何摧隤

竟陵王子良與吳郡太守安陸昭王綏書云

竊承下風數十年來姑蘇未有此政

王規為吳郡太守簡文帝為作謝章曰

臣今駕吉祥之車入勾吳之境驅緹扇之馬撫奉德之鄉製錦何階焚絲方始

開皇十年江南高智惠作亂州民顧子元應之

刺史皇甫績遺子元書

曩者偽陳獨阻聲教江東士民困于荼毒朝廷薄伐應
時瓦解吳會臣民白骨還肉惟當懷音感德豈宜自同
吠主翻成反噬吾是隋將何容外交易子析骸未能相
告况足食足兵高城深塹坐待強援綽有餘力何勞踵
輕弊之俗作虛偽之詞以此見期必不可得卿宜曉諭
黎元能早改迷失道非遠

唐燕王靈夔江王元祥滕王元嬰相繼為蘇州

性皆庸懦貪暴時語曰

寧向儋崖振白不事江滕燕虢

獨孤及代房琯作祭李刺史文

孝友慈惠公廉正直姑蘇之役奸鋒構難公秉義勇誅
其渠魁海寇圍逼勾吳震駭公率羸師克翦大敵奇謀
生于死地貞節見于孤城

劉太貞與韋應物書

顧著作來已知足下郡齋燕集相契卞何情致暢茂適

逸如此宋齊間沈謝何劉始精于理意緣情體物備詩人之旨後之傳者甚失其原惟足下制其橫流師摯之始闕雖之亂于足下之文見之矣

韋夏卿為刺史息民令曰

矜老疾活艱民凡在庶物令趣其本

賜章岵詔

元豐元年到任

吏不數易然後得以究其才今夫蘇劇郡而爾為之守克有能稱嘉省厥勞仍其舊服往惟率職不懈以稱吾

久任之意哉

范仲淹舉從事張伯玉辭

天賦才敏學窮閭奧善言皇王之治博達古今之宜素
蘊甚充清節自處

邵琪張青反覆為盜命諸將毋得招安知府胡
松年上言

大軍四合連旬不能破賊今賊據通州崇明鎮沙上砦
柵之外水淺舟不可行泥深人不可涉本府錢糧已費

十三萬貫石公私騷然而賊未可睥睨况劉光世兵將多西北人一旦從事江海有掉眩不能飲食者安能與賊較勝負于矢石間

答向子諲乞休詔

紹興中時知平江府

卿從朕羈紲晚登禁途昔漢二疏以官成名立乞骸未若方被寵遇神明未衰如卿今日也

劉宰贈知平江王遂言

士友當親而賢否不可不辨財利當遠而會計不可不

明折獄以情母為私意所牽薦士以才母為權要所奪
當言則言不視時而退縮可去則去不計利而遲回庶
幾名節之全

吳樵為平江節度推官嘗謂人曰

淳祐中

樵居官既久深知吳風吳人尚奢而爭勝所事不切寧
拚百萬錢嫁女不能拚十萬錢教子弟寧捨十萬錢遣
婢妾不能以一萬錢延好師友故使子弟不知書識字
但廣置田宅計較微利殊不思異時反貽子孫不肖之

害故人以歆目之蓋以此也

王禹偁為長洲令自叙

禹偁名利之流也一身之計有親族妻子焉雖內無妄
外無僕不可去者凡百指晨有炊爨夕有脂燭伏臘慶
弔居其外月得俸金大半長物是以從官三年徒行而
已一邑之政有租庸稅調焉土甚瘠而民不懈吏好欺
而賦愈重廉其身而濁者忌之直其氣而曲者惡之懇
無知音動有變畏去年稼多不登編戶艱食賦歛之數

有乖其期而民部督成于郡郡侯歸罪于縣鞭笞之人
日不下數百輩菜色在面而血流于膚讀書為儒胡寧
忍此因出吏部考課歷納質于巨商得錢一萬七千市
白粳而代輸之始可免責春夏以來民有歸其直者蓋三
分有其二焉

入朝又上疏曰

臣舊知蘇州長洲縣七十餘家自錢氏納土以來朝廷
命官七年無縣尉使主簿魚領之未嘗闕事三年增置

縣尉未嘗立一功以臣詳之天下大率如此誠能省尉
三千員減俸數十萬以供邊備寬民賦亦大利也

范文正公送錢振常熟主簿歸省詩

姑蘇臺下水如藍天賜仙卿奉旨甘梅淡柳黃春尚淺
王孫歸思滿江南

振郡人亦吳越之裔

黃震為吳縣尉請禁復叛焚屍亭呈府文

焚屍外域之法凡史傳所書仇怨刑戮之酷罪盈惡極

乃有焚滅遺骸亦戰國以來之事古無有也然殺者常
刑焚者非法非法之虐且不可施于誅死之罪人況父
母骨肉乎今吾所處中國耶外域耶傷風敗俗莫此為
甚其亭宜令勿再置

徐理論吳縣知縣葉玄圭

玄圭為治一本經術先律已而後齊人惟理之從法之
守他無恤也官長承迎之私不行寮吏比周之情不接
豪猾狡攘之奸不得行故雖深得細民之心而忌者亦

衆或軋之于上怵之于下咻之于傍玄圭堅不動至是
循良之效白焉

徐誼論水利之切于時者

昔下流不疏而水上溢故鑿直曲港還三江故道開宜
興百瀆所以順導下流也惟高原田徑乃潞堰之爾昔
之言水如單鍔夾亶皆是也今開吳淞江下流與宜興
百瀆屬之海者無慮數十百所異時浦港磬折以趨海
今近浦之民多取徑直疏決蘇湖常秀舊為澤國比年

雨或後至種且不入蓋圍田衆而疏道多也小人見利
不畏其害圍于淺水既為高田圍于茭蕩既為稻田二
俱不已復有下脚始之重陂太平為平始之良田背水
自曬十日不雨農廢作業然且承用舊說又將疏之失
利害之實矣故舊田溝澮當濬治圍田下脚無輒開已
開未填當捺合今之言水能行是三說則高原舊田還
為衍沃而農不病矣

間閱書傳中有闕吳中吏治者摘錄於此

嚴助諭淮南王

今者大王以發屯臨越事上嘗陛下故遣臣助告王其
事朝有關政遺王之憂陛下甚恨之夫兵固凶器然自
五帝三王禁暴止亂非兵未之聞也漢操生殺之柄以
制海內之命危者望安亂者仰治今閩越王狼戾不仁
陛下為萬民安危久遠之計故遣兩將屯于境上震威
武揚聲鄉屯曾未曾會天誘其衷閩王隕命輒遣使者罷
屯無後農時南越王甚嘉被惠澤故遣太子入侍此則

陛下深計遠慮之所出也事效見前故使臣助來諭王
意

陸喜西州清論品格篇

或問喜薛瑩國士之第一者乎答曰以理推之在乎四
五之間夫孫皓無道若龍蛇其身潛而勿用趣不可測
此第一人也避尊居卑祿代耕養玄靜守約第二人也
侃然體國以方見憚執正不懼此第三人也斟酌時宜
在亂猶顯時獻微益此第四人也溫恭脩慎不為諂首

從容保寵此第五人也過此以往不足復數故第二已上多淪沒而遠悔吝第二已下有聲位而近咎累是以深識君子晦其明而履柔順也

太康中徵喜詔曰

陸喜等並以貞潔不容皓朝或忠而獲罪或退身修志勅所在以禮發遣須到隨才授用

陸曄居喪孝顧榮與人書

士光氣息裁屬慮其性命言之傷心

晉明帝詔

騰清操忠貞歷職顯允其兄弟事君如父憂國如家歲寒不彫體自風義既委以六軍可錄以尚書事加散騎常侍

王導請婚于陸玩玩對曰

培塿無松柏薰蕕不同器玩雖不才義不能為亂倫之始

華覈薦陸祿表

裨體質方剛器幹彊固董率之才魯肅不過才武果毅
臨財有節夫夏口賊之衝要宜選名將以鎮戍之臣謂
莫善于裨

華覈薦交州刺史陸胤表

胤天姿聰朗才通行潔昔歷選曹遺跡可紀還撫交州
民心歸附商旅平行民無疾疫田稼豐稔州治臨海海
流秋鹹胤又畜水民得甘食惠風橫被化感人神遂憑
天威招合遺散在州十有餘年內無粉黛附珠之妾家

無文甲犀象之珍宜在輦轂股肱王室

王僧達為吳郡太守入閭門曰

彼有人焉顧琛一公兩椽英英門戶陸子真五世內侍
我之流亞慧曉清介正立不雜交遊張緒稱為江東裴
樂

陸襄為鄱陽內史獲郡賊鮮于琮民歌之曰

鮮于鈔後善惡分人無死賴陸君

又解彭李二家忿爭民又歌曰

陸君政無怨家鬪既罷仇共車

陸徽卒太祖下詔曰

徽厲志廉潔歷任恬勤奉公盡誠克己無倦褒榮永由
不幸夙殞言念在懷以為傷恨可贈輔國將軍賜錢十
萬米二百斛謚曰簡子

羊希論陸法真與孫詵書

足下同僚陸錄事東南名地又張玄外孫持身至清年
高官下秉操不衰當日夕相與申意

顧雍子裕襲爵詔永安元年

故丞相雍至德忠賢輔國以禮而侯統廢絕朕甚愍之
其以雍次子裕襲爵為醴陵侯以明著舊勲

薛綜讓顧譚為選曹尚書奏

譚心精體密貫道達微才照衆物德允衆望誠非愚臣
所可越先

吳大帝徵顧承賜顧雍書

貴孫子直令問休休至于相見過于所聞

顧榮為不復飲酒或問之曰何前醉而後醒耶
榮懼乃復飲與楊彥明書曰

吾為齊王主簿恒慮禍及見刀與繩每欲自殺

汝南王統江夏公衛崇並為庶母制服三年尚
書令顧和奏曰

禮所以軌物成教故有國家者莫不宗正明本以一其
統斯人倫之紀不二之道也為人後者降其所出奪天
屬之性顯至公之義降殺節文著于周典按汝南王統

為庶母居廬服重江夏公衛崇本由疎屬開國之緒近喪所生復行重制違冒禮度肆其私情皆可下太常奪服若不祇王命應加貶黜詔從之

潯陽王子房欲加位號于顧凱之辭曰

禮年六十不服戎以其筋力衰謝非復軍旅之日況年將八十殘生無幾守盡家門不敢聞命

張溫使蜀對大帝曰

臣入無腹心之規出無專對之用懼無張老延譽之功

又無子產陳事之効然諸葛亮遠見計數必知神慮屈伸之宜推亮心必無疑貳

張純字元基有清才與同郡張儼朱異俱童少往見朱據據聞三人才名試之曰今三賢屈顧其為吾各賦一物然後乃坐夫騷擾以迅驟為功鷹隼以輕疾為妙何必積思純賦席曰

席以冬設簟為夏施揖遜而坐君子攸宜

儼賦犬曰

守則有威出則有獲韓盧宋鵠書名竹帛

異賦弩曰

南嶽之幹鍾山之銅應機命中射隼高墉

張奕卒昭明太子與晉安王令曰

近張新安故其人才筆弘雅亦足嗟惜

張岱為吳郡太守齊高帝賜手勅曰

大郡任重乃未欲回換但總戎務殷宜須望實今用卿
為護軍加給事中

齊高帝賜張融手詔曰

見卿衣服粗故誠見素懷藍縷亦虧朝望今送一通故衣意謂舊乃勝新也

恒州刺史張府君墓志銘

張說

君諱承休字某吳郡人也留侯與漢播美西京長沙徙吳蔽蔓東土曾祖沖在陳為文帝師入隋為漢王學士祖後肩授經太宗尊之以祭酒既封新野又贈以宗伯考少師位不充量止于朱陽宰班固稱世名忠孝魏武

為積善之家昌門一系暉我諸族君受天戩穀傳家業
藝希言敦行去華崇實非法不由非禮不動精于物理
敏于政事竊以南郊齋郎補兗州兵曹丁太夫人憂廬
墓三年加人一等再任闕州司倉應八科舉改鄭州錄
事參軍又舉賢良方正遷揚州司錄參軍移蘇州常熟
令歷政皆有能名加朝散大夫入為司農丞實掌錢穀
出為原闕使覆囚嶺南是司獄訟聽折惟允迺授濟源
令風行畿甸河澗洛師加朝議大夫上柱國拜隆州司

馬轉恒州長史簡而有孚權而有中道嬰風憲去職就醫還京春秋六十有二終于領政里夫人成紀郡天水秦氏廬陵郡公行師之孫嗣公遊福之女敬事君子訓成諸孤當代之孟母也年六十二終于許州開元九年十月某日合葬于武功之禮讓原禮也夫道大難合仕屯而不進德高有後身沒而福流君同生八人半服銀艾祚胤五子率為珪璋比迹于燉煌六龍南鄭千室德門濟美信有徵乎懼陵谷或遷乃勒銘沈石銘曰

思文留侯時維皇祖長沙南守分韓東土家有道書門
傳相府鬼箴重世通徑二主誕靈上哲克廣斯文造次
仁義優游典墳孝乎事親忠乎事君猗那叔父亦足有
云

蘇州志作崑山人昌門作閭門蓋其居閭門也

張從師墓志

張說撰文集無此文

沖和純粹辯博宏達卓犖好古儻蕩逸羣忘懷樂道上
元二年終葬虎丘西原子惟儉惟靜弟從申

沈詢為昭義節度使侍兒與奴歸秦通詢將戮之奴懼結牙將為亂攻詢滅其家僚友著宴辭

云

莫打南來雁從他向北飛打時雙打取莫遣兩分飛

范純仁以弟純粹在陝慮其于西夏有立功意與之書曰

大輅與柴車爭逐明珠與瓦礫相觸君子與小人鬪力中國與外邦較勝負非惟不可勝兼亦不足勝不惟不

足勝雖勝亦非也

丁偃初試過英延講藝詩

白虎前芳拚金華舊事輕天心非不寤垂意在蒼生

右吳中名人事蹟或議論可採者雜錄於此

滕茂實自為哀詞

龔鹽老書生謬列王都官索米了無補從事敢辭難殊
憐復盟好仗節來間關城守久不下川途望漫漫儉輩
果不惜一往何當還牧羊困蘇武假道拘張騫流離念

窘束坐閱四序遷同來悉言歸我獨留塞垣形影自相
弔國破家亦殘呼天曾不聞痛甚傷肺肝相逢有兄弟
悼歎安得歡金人自南歸得志鞍馬間波瀾卷大夏一
木乃求安世事寧有此聊發我所存爵祿非所慕金珠
敢懷貪縱或違我心寧不汗我顏昔燕破齊王羣臣望
風奔王蠋獨守節燕人有甘言縊首自絕脰感慨今昔
聞未嘗食齊祿徒以世為氓況我祿數世一死何足論
遠或死江海近或死朝昏斂我不須衣裹屍有黃幡題

作宋臣墓篆字當深刊我妻尚少艾兒女皆童頑四海
無置錐飄流倍悲酸誰當給衣食使不厄饑寒歲時一
酌我聊以慰我魂我魂自悠悠異鄉寄沈寃他時風雨
夜草木號空山

茂實靖康初金人深入假工部侍郎副路允迪出使
河東割地太原陷允迪還至代州金人獨留茂實兄
洵亦在敵尼雅滿聞其名將屈為用亦遷之代復從
京師取其弟華實以慰其意嘗使諭易戎服又驅巾

憤稍高者數人殺之屢加逼脅茂實弗動顧莫能生
還乃自為此詞以暴其志讀其詞者忠義之氣可以
勃然而興矣

張敦死顏延之以書弔其世父湛曰

賢弟子少履貞規長懷理要清風素氣得之天然言面
以來便申忘年之好雖離隔阻而情問無睽薄暮之人
冀其方見慰說豈謂中年奄為長往聞問悼心且兼怛
痛足下門教敦至兼實家寶一旦喪失何可為懷

晉孝武即位詔曰

司徒故左長史張敷貞心簡立幼樹風規居喪毀滅孝道淳至可追贈侍中改其所居為孝張里

孟文龍辭元平章史弼等薦書

文龍未死慚負神明羣公相國以忠孝文龍為羣公起將何以令今之事君者敢以死辭

右皆有闕至性者

顧阿瑛自題其像云

儒衣僧帽道人鞋天下青山骨可埋若說向時豪俠處
五陵鞍馬洛陽街

玉山風流人豪集中美不勝採復錄其題像詩於此
湘東王薦顧協表

臣府兼記室參軍吳郡顧協行稱鄉閭學兼文武服膺
道素雅量邃遠安貧守靜奉公抗直傍闕知己志不自
營年方六十室無妻子臣欲言于官人申其屈滯協苦
執貞退立志難奪可謂東南之遺寶也矣

協卒武帝手詔曰大同八年

顧協廉潔自居白首不衰久在省閨內外稱善奄然殞
喪惻怛之懷不能已已傍無近親彌足哀者大殮既畢
即送其喪柩還鄉并營冢槨並皆資給悉使周辦可贈
散騎常侍令便舉哀

鄭思肖常贈人云

天下皆變吾觀其不變惟其不變乃所以變其變者物
也不變者道也

又云

古人重立身今人重養身立身者蓋超乎千古之上與
天地周流于不知不識之天也養身者惜一粟以活微
命役于萬物死于萬變者又何足道哉

思肖自贊其像曰

不忠可誅不孝可斬可懸此頭于洪洪荒荒之表以為
不忠不孝之榜樣

唐武后徵史德義詔

制蘇州隱士史德義志尚虛玄素履真確沖謙彰于里
閨孝友表于閭庭固辭徵辟長往嚴陵之瀨多謝簪裾
高蹈愚公之谷風操可知啟沃攸佇特宜優獎委以諫
曹

滕元發志侍其沔墓

士生斯世有進取出力得時行道功烈被于民者有行
義脩潔退而講學為一鄉之善士者斯二者用舍不同
要皆天下之強立君子也

右皆卓行可以風世者

公孫聖占詞

公孫聖吳王夫差時人夫差興兵將與齊戰道出胥門
假寐于姑蘇之臺夢入章明宮見兩鑪蒸而不炊兩黑
犬嚙以南嚙以北兩鏐殖宮牆流水湯湯越其宮堂後
房鼓震篋篋有鍛工前園橫生梧桐命太宰詒占之詒
曰美哉王之伐齊也章者德鏐鏐也明者破敵聲聞昭
明也兩鑪蒸而不炊者聖德氣有餘也兩黑犬嚙以南

嗥以北者四海服朝諸侯也兩錫殖宮牆者農功就成
田夫耕也流水湯湯越宮堂者隣國貢獻財有餘也後
房簾簾鼓震有鍛工者宮女悅樂琴瑟和也前園橫生
梧桐者樂府鼓聲也吳王大悅而心不已復召王孫駱
問之駱曰臣鄙淺不能占東掖門亭長長城公弟公孫
聖多見博觀知鬼神之情狀願王問之王乃召公孫聖
聖伏地而泣其妻謂曰子何性鄙今王急召乃涕泣乎
聖曰悲哉非子所知今日壬午時加南方命屬上天不

得逃亡非但自哀誠傷吳王吾受道十年隱身避害欲
紹壽命不意急召中世自棄故悲與子相離耳遂詣姑
蘇臺吳王告其夢聖曰臣不言聲名全言之必死于王
前臣聞章者戰不勝走偉惶也明者去昭昭就冥冥也
入門見鏹蒸而不炊者不得火食也兩黑犬嚙以南嚙
以北者黑者陰也北者匿也兩鋌殖宮牆者越軍入吳
伐宗廟掘社稷也流水湯湯越宮堂者宮室墟也後房
鼓震篋篋者坐太息也前園橫生梧桐者梧桐心空不

為用器但為盲僮與死人俱葬也願大王按兵修德遣
下吏肉袒徒跣稽首謝于勾踐國可安存身可不死吳
王怒曰吾天之所生神之所使顧力士石番以鐵槌擊
殺之

右伎術

王僧達禮致褚伯玉丘僧珍與僧達書

聞褚先生出居貴館此子滅景雲栖不事王侯有年載
矣自非折節好賢何以致之

僧達答書

褚先生從白雲遊舊矣冀其來比談芝桂借訪薜蘿若
已窺烟液臨滄洲矣

吳中流寓高人韻士不能盡載偶附二書於此

姚信上張白妻鬱生貞節表

臣聞唐虞之政舉善而教旌德耀異三王所先是以忠
臣烈士顯名國朝淑婦貞女表迹家閭蓋所以闡崇化
業廣殖清化使苟有令性幽明俱著苟懷懿姿士女同

榮故王燭建寒松之節而齊王表其里義姑立殊絕之
操而魯侯高其門臣竊見故鬱林太守陸績女子鬱生
少履貞特之行幼立匪石之節年始十三適同郡張白
侍廟三月婦禮未卒白遭罹家禍遷死異郡鬱生抗聲
昭節義形于色冠蓋交橫誓而不許奉白姊妹嶮巖之
中蹈履水火志懷霜雪義心固于金石體信貫于神明
送終以禮邦士慕則臣聞昭德以行顯行以爵苟非名
爵則勸善不嚴故士之有誅魯人志其勇祀婦見書齊

人哀其哭乞蒙聖朝斟酌前詞上開天聰下垂坤厚褒
鬱生以義姑之號以厲兩髦之節則皇風穆暢士女改
視矣

許邁別妻孫氏書

欲聞懸溜之響山鳥之鳴以為簫韶九成不能勝也寓
景青葱之下栖息巖岫之室以為殿堂廣廈不能過也
情聽所鍾志絕于此吾其長別離矣

孫答書

愚下不才侍執巾櫛榮華福祿相與共之如何君子篤
其大義輕見斥逐若以此處遐曠非婦人所便昔梁生
陟嶺孟光是攜蕭史登臺秦女不舍衛人修義夫婦同
行老萊逃名伉儷俱逝豈非古人嘉遯之舉許君行矣
李氏女咏破錢詩

半輪殘月拚塵埃依稀猶有開元字想得清光未滅破
買盡人間不平事

右錄列女數條

梅詢贈東禪寺林遇詩

出入常攜一古藤
三衣粗重貌稜稜
紅塵酒滿何曾醉
知是僧中第幾僧

蓑衣真人何中立詩

為問先生意若何
不論寒夏只披蓑
若人會得蓑衣意
一路相將入大羅

其二

白雲樓閣在烟霞
萬里嵯峨是我家
莫道太平無一事

自然平地有丹砂

其三

水綠山青好去遊
花紅酒醉幾時休
轉頭不覺無常別
萬古惟存一土丘

其四

寥寥香散綠沈風
野地清閒到處逢
買得四窻今夜月
這回認取主人翁

其五

夜來斗轉與星移日出扶桑又落西自有金丹光落落
十人萬處有誰知

其六

滿眼紅雲花又新年年香散玉樓春時人笑我顛狂漢
我更顛狂笑殺人

又雜言詩一首

不梳頭不漂浴免得堂前妻兒哭或吟詩或唱曲富貴
榮華無所欲身貧道不貧六根常具足

又五言絕句三首

此寺何年造問僧僧不知下馬問香草拂塵看古詩
活得三千歲仍饒八百年若教縫合眼別是一山川
白雲山下去山下強人多強人難說話拍手笑呵呵
吳中方外靈迹之著者稱宋蓑衣真人其詩多流傳
人間附錄于此

王會之墓志銘

王安石

君諱逢字會之姓王氏太平州當塗人也嘗舉進士不

中去以所學教授于是蘇州士人從轉運使乞君主其
學學者嘗致數千百人君所獎養成就者多矣乃始以
進士起家權南雄州軍事判官歸試得超等補袁州軍
事判官留為國子監直講兼隴西郡王宅教授李某內
行修謹君蓋有力焉岐國公主既嫁為君求遷有命矣
君辭焉乃已君少以文學知名于書無所不觀而尤喜
易作易傳十卷乾德指說一卷復書七卷名士大夫多
善其書者于是樞密使張公舉君可試館職而宰相無

知君者故不用通判徐州以疾不赴求監蘇州酒以嘉祐八年正月六日不起年五十九終太常博士君為人樂易篤于朋友故舊于勢利無所苟能愛人以得其歡心君皇祖考延嗣祖考皆不仕而皇考以君故贈大理評事前夫人蘇氏後夫人陳氏皆無子陳氏名家子亦有賢行以嘉祐八年四月二日葬君蘇州吳縣三玄鄉陸公原以前夫人蘇氏祔焉銘曰

宜壽也五十而已宜貴也止于博士謂卒有後也而終

無子嗚呼夫子命不可與謀其歸其永安于茲丘

永嘉縣君陳氏墓志銘

陳氏于蘇州為大姓夫人者太子中允諱武之子某官
贈太常卿諱郁之孫左贊善大夫諱質之曾孫而太常
博士王君諱逢之妻也昭明順善動有禮法以不及養
姑舅也故于祭祀尤謹博士祿賜盡之宗族朋友不足
則出衣服簪珥助之而不言選飾妾御進之不思然博
士終無子蓋吾聞于博士者如此撫博士之兄子如已

子哭博士三年未嘗如陳氏除喪大貧顯者求以為妻
族人強之不可又強之則涕泣自誓居頃感疾以死蓋
吾聞于博士之兄子景元者如此然夫人之行非特出
于二人之言凡習陳氏王氏者皆知其為賢而哀其志
其封曰永嘉縣君其卒于蘇州以治平二年十一月九
日年三十八其葬以三年十一月某日從博士于閭門
之西原銘曰

穀也從于此喪也隨以死歸義于命奚傷乎無子

王博士逢暨配陳氏皆有賢行見荆公集中

尚書兵部員外郎知制誥謝公行狀

公諱絳字希深其先陳郡陽夏人以試秘書省校書郎
起家中進士甲科守太常寺奉祀郎七選至尚書兵部
員外郎以卒嘗知汝陰縣校理秘書直集賢院通判常
州河南府為開封府三司度支判官與修真宗史知制
誥判吏部流內銓最後以請知鄧州遂葬于鄧年四十
六其卒以寶元二年公以文章貴朝廷藏于家凡八十

卷其制誥世所謂常楊元白不足多也而又有政事材
遇事尤劇常若簡而有餘所至輒大興學舍莊懿明肅
太后起二陵于河南不取一物于民而足皆公力也後
河南聞公喪有出涕者諸生至今祠公像于學鄧州有
僧某誘民男女數百人以昏夜聚為妖積六七年不發
公至立殺其首弛其餘不問又欲破美陽堰廢職田復
召信臣故渠以水與民而罷其歲役以卒故不就于吏
部所施置類此其在朝大事或諫小事或以言郭太后

失位稱詩白華以諷爭者貶公又救之嘗上書論四民
失業獻大寶箴議昭武皇帝不宜配上帝請罷內作諸
音巧因災異推天所以譴告之意言時政又論方士不
宜入宮請追所賜詔又以為詔令不宜輕出數易請繇
中書密院然後下其所常言甚衆不可悉數及知制誥
自以為近臣上一有所不聞其責且預我愈慷慨欲以
論諫為吾事故其葬也廬陵歐陽公銘其墓尤歎其不
壽用不極其材云卒之日歐陽公入哭其堂槨無新衣

出視其家庫無餘財蓋食者數十人三從孤弟姝皆在而治衣櫛纔二婢平居寬然貌不自持至其敢言自守矯然壯者也謝氏本姓仕自受氏至漢魏無顯者而盛于晉宋之間至公再世有名爵于朝而四人皆以材稱官行事來白願有述也將獻之太史謹撰次如右謹狀

謝景回墓志銘

君姓謝氏諱景回字師復以泰寧軍節度掌書記諱崇

禮者為曾大父以太子賓客陳留公諱濤者為大父而
兵部員外郎知制誥陽夏公諱絳者之少子也幼好學
有大志聰明卓然不類童子年十九所為文辭已可傳
載于是得疾不可治以嘉祐四年十二月丙子棄世于
漢東人莫不為謝氏哀之諸兄以八年十月乙酉葬君
鄧州穰縣五壘原之兆而臨川王某為銘曰
攻乎其為良汰乎其為精吾見其質吾聞其聲如或毀
之用不既于成哀以銘詩亦慰其兄

戶部尚書郁公墓志銘

解縉

永樂三年八月五日戶部尚書郁公薨于位上遣官祭以文命工曹具櫬輟朝一日顧翰林學士臣縉等歎息稱其才嗚呼公之哀榮始終固可美國家所以待臣庶恩禮之厚尤足以激勸于當世公之子孫豈不永有庇賴歟于是其子彬衰麻踵門泣而致公之治命請銘其墓噫公與予交二十年未嘗爾汝褻狎亦未嘗挾長殺敬禮予二人者亦自信為誠實洪武二十二年予侍講

華蓋殿中公始受命為戶部度支主事賜名新明年改戶部司屬十二年陞北平部郎中二十四年六月超授嘉議大夫戶部右侍郎考滿上于庭中稱譽擢尚書授資善大夫十三年于茲矣非才而能之乎抑公之盛福其祖考以來積累之慶非偶然而致也公家素饒財慷慨豪舉不為齷齪喜賓客樂于賑窮乏不為德色洪武中奏事庭中被顧問天下戶口漕運地里險易計數時日應機響應無遺謬自謂劉晏以下不論也晚歲多疾

乃時在告上甚憐之公亦時自語予吾覺衰老恐旦夕
先朝露不能報國恩吾平生無卓異惟君知也幸與之
銘其墓紀其榮遇而已嗚呼公非可謂達歟公蘇人也
曾祖神和祖瑜父德字銘本公以至正丙戌正月十四
日生于吳縣洪武元年祖父遷居鳳陽臨淮縣公隨而
家焉公娶嚴氏綜理家政嚴而有緒子彬字孟文亦克
孝敬公嘗屬之予曰他日視之曰余故人之子即吾子
之榮也公墓在臨淮古城之原銘曰

古大司徒職惇典禮馴擾兆民豈惟會計惟公奮身非以豈弟恂恂其容爵祿之器厯官有年光榮後先豈曰有才有得于天豈無人謀不如盛福崇崇其阡臨淮之麓

尚書郁公神道碑銘

國朝復先王之典禮所以付任才能用掌舊典裁成輔相以全天下之士保其初終恩兼新故大小之臣咸稱職業班班有可稱道者豈惟天祐國家而賜之以多賢

亦國家深仁厚澤有以積累克稱天心也嗚呼豈不盛哉乃洪武戊辰歲予以年少擢進士為中書舍人直翰林日侍講華蓋殿中時時引選官居上前講官不避即顧問可否輒以直對一日見鳳陽郁公于儕衆中姿貌瓌偉音吐宏暢威儀整齊竊心異之上果賜名新即命戶部度支主事度支掌內幣賜予內直所與文淵閣相通時相見與之議論練達經歷久相善也未幾公陞北平部郎中先是戶部其屬有四歲分為十二故有是

命進階奉議大夫二十四年超授嘉議大夫戶部右侍郎每奏事庭中玉音顧問天下地里陰陽戶口漕運之數民間利害無巨細皆響應無所遺謬在廷之臣莫不以難而讓然每事咨度其屬能者未嘗以精敏自多名位自高人又莫不以為難及考滿晉陞尚書益寬大得體不為瑣屑授資善大夫喪母歸葬賓客至者數郡蓋公平生慷慨急于義饒財而好施尊禮儒生雅志喜交游不為冷熱變親戚有急患難不避治家有法綜理微

密而不傷于繁雖國家能成人才如公之才亦可謂難能者也今永樂三年八月五日公卒于官上賜棺殮祭之為素服輟朝一日士大夫盛以為榮公本蘇州吳縣人曾祖神和祖瑜父德字銘本母某氏祖父以洪武初遷鳳陽公隨而家焉公妻嚴氏尤善理家公于家事不以為言而井然有條無不舉公生至正丙戌正月十四日年六十子彬字孟文將奉公之柩歸葬于鳳陽臨淮公嘗託予銘其墓而神道之碑亦不可無刻也乃叙而

係之詩曰

泰運肇開賢彙生巨細咸植勲業成有奮布衣位六卿
寬裕強敏豈惟承有善不伐貴不盈人道不惡天所矜
有崇斯阡其永寧

吳山書院記

吏部侍郎兼左春坊左贊善許思溫吳郡人也少時躬
稼奉親讀書吳山出登太學為御史歷職憲副遂擢今
官于予有同寅之好乃請為文記其吳山書舍予平生

足跡半天下恨不得一至吳中靈巖虎丘天平之雄峙
湖海江潮之奇浸四方人物之都會每讀昔人之文未
嘗不為之慨然太息也且夫世人之于讀書也高談道
學猶以為喪志近務事功者棄以為無用於戲是豈嘗
知讀書之理也哉自怠而厭其勤苦者託辭以飾非自
昧而不達乎義理者謗言以護短故例以儒生為迂濶
而以文籍為陳言耳究其心亦未嘗不知之也故有因
其心而直曉之有不報然而愧者蓋鮮矣是故文字之

作聖人開天闢地之機行乎陰陽而通乎造化萬彙之
總鬼神不能違者也而豈出乎此理之外哉而豈可指
而謂之喪志而無用也哉六經聖人之書也諸史歷代
之書也諸子百家凡能言者之書也下至商賈技術莫
不有書擇其善者而行未有不善也自天文律歷地里
農田水利風俗人材學校選舉鹽鐵細務皆有書皆所
以集事成功者也自昧而不通者而可謗之哉六經所
以治心修身治國平天下而為道學之本也自怠而厭

其勤者而可假喪志之言以飾其非歟喪志之云為不
精專者發耳不專志而務夸多鬪靡以為人也則又反
不讀書之為愈此有激而云者而豈可謂書之不必讀
也哉予觀生民以來未有不知書之聖人者予嘗以為
流俗歎也許公之意與予合故仕既顯矣請為之記其
書舍以為子孫後世勸將使之有興起于讀書也為之
記而係以詩

天開象緯日與星地靈川嶽萬彙形義書一畫河洛呈

萬世照耀傳六經賢傳羽翼衆喙鳴博通貫一量重輕
譬猶作室矩度程羣材咸萃無奇羸曲可使直陂可平
指顧左右集大成吳山屹立太古青書舍臨高踈牖櫺
紫雲紅霧棲前楹萬家玉樹森在庭牙籤歷歷黃金滕
萬軸插架明星熒斗牛午夜虹光潁天官早歲曾躬耕
養志餘力篝火燈布幃黝黑積暈沈秋囊或貯山下螢
有草如帶似堯蓂隱德自足通山靈時來九萬隨風鵬
橋門壁水揚華英鐵冠弭筆朝承明繡衣持斧白玉京

從龍天飛掌銓衡春官侍從駕鸞停乃知讀書助脩能
萬事轉圜無滯凝他年有待懸車榮錦袍山下濯冠纓
買舟相送試一登吳中俊彥來相迎歡呼共覩名公卿
鄉人子弟傳頌聲重作吳山書舍銘

南宮生傳

高啟

南宮生吳人偉軀幹博涉書傳少任俠喜擊劍走馬尤
善彈指飛鳥下之家素厚藏生周養賓客及與少年飲
博遨戲盡喪其資逮壯見天下亂思自樹功業乃謝酒

徒去學兵得風后握奇陣法將北走中原縱豪傑計事
會道梗周流無所合遂遡大江遊金陵入金華會稽諸
山蒐覽瓌怪渡浙江泛具區而歸家居以氣節聞衣冠
慕之爭往迎候門止車日數十兩生亦善交無貴賤皆
傾身與相接有二軍將恃武橫甚數毆辱士類號虎冠
其一嘗召生飲或曰彼醜不可近也生笑曰彼羸人惡
能勇吾即柔之矣即駕往坐上座為語古賢將事其人
竦聽引尊下拜起為壽罷會無失儀其一嘗遇生客次

顧生不下已目憎生而起他日見生獨騎出從健兒帶
刀策馬踵生後若將肆暴者生故緩轡當中道進不少
避知生非懦儒遂引去不敢突冒訶辟明旦介客詣生
謝請結歡生能以氣服人類如此性抗直能辨好箴切
友過有忤已則面數之無留怨與人論議斬必勝然援
事析理衆中莫能折時藩府數用師生私策其雋蹶多
中有言生于府府欲致生幕下不能得將中生法生以
智免家已貧然喜事故在有饋酒肉立召客與飲啖相

樂四方游士至吳察其賢必與周旋款曲延譽上下所知有喪疾不能葬療者以告生輒令剗櫬疏所乏為請諸公間營具之終飲其德不言故人皆多生謂似婁君卿原巨先而賢過之久之稍厭事將迎闔門闢一室度歷代法書周彞漢研唐雷氏琴日游其間以自娛素工草隸逼鍾王忠求者衆遂自閔希復執筆歆慕靜退時賦詩見志泊然處約若將終身生姓宋名克字仲溫家南宮里故自號云

贊曰生之行凡三變每變而益善尚俠末矣欲奮于兵
固壯然非士所先晚乃刮磨豪習隱默自將履藏器之
節非有得能之乎與夫不自知反違遠道德者異矣

右借南宮自書方冊上抄之已未七月十日

送張同知之官嘉定序

鄭元祐

吳為澤國獨吳縣為有山山突起以環具區蹴烟浪多
至七十二峯初子胥未入城吳猶宮于靈巖更今二千
年故宮陳迹尚多存者登臨探討感念今昔未嘗不令

人惻愴興懷也縣令張君德常係金壇文獻故家早以才器知名江表奉其尊嚴避地來吳未幾徒步起家為縣丞遭隣境失守民心恟恟不安君雖丞其所以撫息之者逾于尹聲聞日章遄陞縣尹使為尹承平時猶斤斤不易況軍旅殘破之後乎德常之尊已老白首移孝以為政于一邑其惠及于民者真所謂息黥而補劓生死而骨肉無媿于古之人于是民氣稍稍復完今茲五閱寒暑政譽洋溢用年勞陞授嘉定州同知夫既尹大

縣民戴恩德自宜守一州然猶任州佐于海隅者千尋
之木棟梁之具昭然匠石養之而未之顧者期望者大
也早晚施之用且將柱明堂建清廟凝然荷萬鈞而無
少餽飢矣吳人分題賦詩以送之而屬某為之叙

沈祖母王碩人壽九秩序

子于父母其屬近其情昵其恩至故彼此之分顯易以
敷施而人情之所以感發而歎咏者亦曰父兮生我母
兮鞠我又曰陟彼岵岵瞻望父母與夫堂構舊籜又皆

屬于父子至謂生之膝下以養父母日嚴凡此聖人皆系乎父母之于子而祖孫不與焉若孫之于祖情非不昵也恩非不至也聖人設教忠厚之至豈不欲引而近之然其等威隆殺自有不得而同者原夫尊親不以遠而可疎也不以近而可褻也故曰尊祖曰敬宗曰睦族職是之故孫之于祖其養當益厚禮當益嚴情當益致然自書傳之所紀載孫及養其祖者蓋甚寡由是李令伯遂著名于不朽也吳人沈君仲說自其先府君不祿

于今若干稔矣顧其祖母王碩人綜理家事鞠育仲說以迄于成人今仲說年四十餘不惟讀書積學度越流輩至于履踐之素言行之實無一不求合古人欲所以奉其祖母者食飲溫清起居定省畧弗異乎孝子之事慈母也今年至正庚寅碩人壽登九秩九月廿九實其生辰仲說具酒張筵為碩人壽凡親舊里隣畢至清樾堂先是夏天子賜高年帛碩人以九十頒雙縑仲說用製衣碩人碩人雖屆期頤而神觀澄澈覩其孫之婦復

令曾孫拜于前而親舊里隣無不拜相次進酒為壽以
為世所罕得同郡錢伯行天台陳敬初輩咸奉書以慶
而予後至俾序篇端夫人所以事親者豈不欲致養然
未必能享上壽使誠有之又未必如仲說養志不衰也
然則天將報仲說者有子有孫皆將如仲說碩人雖老
行且見之沈氏其昌大矣乎詩曰孝孫有慶此之謂也
右雜文數篇皆取有關風化可敬慕者不復詮次云
吳都文粹續集補遺卷上